

SL(6)568 – Rheoliadau Addysg (Cyllid Myfyrwyr) (Diwygiadau Amrywiol) (Cymru) 2025

Cefndir a diben

Mae'r Rheoliadau hyn, sydd mewn wyth Rhan, yn diwygio amryw Rheoliadau sy'n gwneud darpariaeth ynghylch cyllid myfyrwyr, ac mewn cysylltiad ag ef.

Mae Rhan 1 yn gwneud darpariaeth ynghylch dod â'r Rheoliadau hyn i rym a'u cymhwyso;

Mae Rhan 2 i Ran 8 yn gwneud diwygiadau i'r Rheoliadau a ganlyn—

- (a) Mae Rhan 2 yn diwygio Rheoliadau Addysg (Ffioedd a Dyfarniadau) (Cymru) 2007 ("Rheoliadau 2007");
- (b) Mae Rhan 3 yn diwygio Rheoliadau Addysg (Athrofa Brifysgol Ewropeaidd) (Cymru) 2014 ("Rheoliadau 2014");
- (c) Mae Rhan 4 yn diwygio Rheoliadau Addysg Uwch (Cyrsiau Cymhwysol, Personau Cymhwysol a Darpariaeth Atodol) (Cymru) 2015 ("Rheoliadau 2015");
- (d) Mae Rhan 5 yn diwygio Rheoliadau Addysg (Cymorth i Fyfyrwyr) (Cymru) 2017 ("Rheoliadau 2017");
- (e) Mae Rhan 6 yn diwygio Rheoliadau Addysg (Cymorth i Fyfyrwyr) (Cymru) 2018 ("Rheoliadau 2018");
- (f) Mae Rhan 7 yn diwygio Rheoliadau Addysg (Benthyciadau at Radd Ddoethurol Ôl-raddedig) (Cymru) 2018 ("y Rheoliadau Benthyciadau at Radd Ddoethurol");
- (g) Mae Rhan 8 yn diwygio Rheoliadau Addysg (Cymorth i Fyfyrwyr) (Graddau Meistr Ôl-raddedig) (Cymru) 2019 ("Rheoliadau 2019"); ac

Mae'r diwygiadau a wneir gan y Rheoliadau hyn:

- (a) yn diweddu'r diffiniad o "gwladolyn Wcreinaidd a ddiogelir" yn Rheoliadau 2007, Rheoliadau 2014, Rheoliadau 2015, Rheoliadau 2017, Rheoliadau 2018, y Rheoliadau Benthyciadau at Radd Ddoethurol a Rheoliadau 2019 i gynnwys personau y rhoddir caniatâd iddynt i aros yn y Deyrnas Unedig o dan gynllun newydd, sef Cynllun Estyn Caniatâd Wcráin, fel bod personau o'r fath yn gymwys i gael statws ffioedd cartref, y terfynau ffioedd a chymorth i fyfyrwyr,



- (b) yn darparu bod categorïau penodol o fyfyrwyr yn Rheoliadau 2007, Rheoliadau 2015, Rheoliadau 2017, Rheoliadau 2018, y Rheoliadau Benthyciadau at Radd Ddoethurol a Rheoliadau 2019, sy'n ei gwneud yn ofynnol i fyfyrwr fod wedi setlo yn y Deyrnas Unedig, yn dod yn gymwys i gael statws ffioedd cartref, y terfynau ffioedd a chymorth i fyfyrwyr pan fyddant yn cael eu statws preswlydd sefydlog yn ystod blwyddyn academiaidd,
- (c) yn diweddarau'r categorïau o fyfyrwyr yn Rheoliadau 2007, Rheoliadau 2015, Rheoliadau 2018, y Rheoliadau Benthyciadau at Radd Ddoethurol a Rheoliadau 2019, sy'n ymwneud â phersonau sydd wedi setlo yn y Deyrnas Unedig o'r tiriogaethau tramor Prydeinig, er mwyn darparu i ddinasyddion Prydeinig o dras Chagosaid fodloni'r gofynion o ran preswlio fel arfer o dan y categorïau hynny, fel bod personau o'r fath yn gymwys i gael statws ffioedd cartref, y terfynau ffioedd a chymorth i fyfyrwyr,
- (d) yn darparu i fyfyrwyr sy'n ymgymryd â blwyddyn ryngosod gymhwyso i gael grant myfyriwr anabl o dan Rheoliadau 2018, i'r graddau y mae'n ymwneud â darparu cymorth technegol, atgyweirio neu amnewid mewn cysylltiad ag offer a ddarparwyd neu a gymeradwywyd ar eu cyfer yn flaenorol o dan grant o'r fath,
- (e) yn darparu i fyfyrwyr sy'n bersonau sy'n ymadael â gofal gymhwyso i gael y didyniad is sydd ar gael wrth gyfrifo swm y grant at deithio sy'n daladwy iddynt o dan Rheoliadau 2018,
- (f) yn hepgor cyfeiriadau at ddomisil mewn darpariaethau sy'n ymwneud â chyfrifo neu drin incwm o dan Rheoliadau 2014, Rheoliadau 2017, Rheoliadau 2018 a Rheoliadau 2019, a fydd yn ddiangen o ganlyniad i newidiadau, o 6 Ebrill 2025 ymlaen, i drethiant unigolion heb ddomisil yn y DU,
- (g) yn gwneud cywiriadau i Rheoliadau 2017 a Rheoliadau 2018, mewn cysylltiad â diwygiadau a wnaed i bob un o'r Rheoliadau hynny gan Rheoliadau Addysg (Cyllid Myfyrwyr) (Diwygiadau Amrywiol) (Rhif 3) (Cymru) 2023, i egluro hyd cyfnod penodol o amser ac i ddisodli term gwallus yn y testun Cymraeg, yn ôl eu trefn, ac
- (h) yn hepgor darpariaethau diangen sy'n ymwneud â Chynllun KESS 2 yn y Rheoliadau Benthyciadau at Radd Ddoethurol a Rheoliadau 2019, sy'n ddiangen o ganlyniad i gau'r cynllun hwnnw.

Gweithdrefn

Negyddol

Gwnaed y Rheoliadau gan Weinidogion Cymru cyn iddynt gael eu gosod gerbron y Senedd. Gall y Senedd ddirymu'r Rheoliadau o fewn 40 niwrnod (ac eithrio unrhyw



Senedd Cymru
Pwyllgor Deddfwriaeth, Cyfiawnder a'r Cyfansoddiad
 —
 Welsh Parliament
Legislation, Justice and Constitution Committee

ddiwrnodau pan fo'r Senedd: (i) wedi'i diddymu, neu (ii) ar doriad am fwy na phedwar diwrnod) i'r dyddiad y'u gosodwyd gerbron y Senedd.

Materion technegol: craffu

Ni nodir unrhyw bwyntiau i gyflwyno adroddiad arnynt o dan Reol Sefydlog 21.2 mewn perthynas â'r offeryn hwn.

Rhinweddau: craffu

Nodwyd y pwynt a ganlyn i gyflwyno adroddiad arno o dan Reol Sefydlog 21.3 mewn cysylltiad â'r offeryn hwn.

1. Rheol Sefydlog 21.3(ii) - ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd

Nodwn fod y Rheoliadau hyn yn gwneud cywiriadau technegol mewn ymateb i adroddiad y Pwyllgor ar Reoliadau Addysg (Cyllid Myfyrwyr) (Diwygiadau Amrywiol) (Rhif 3) (Cymru) 2023. Yn benodol, nodwn y paragraff a ganlyn yn y Memorandwm Esboniadol:

"Mae Rheoliadau 2025 yn gwneud cywiriadau technegol i Reoliadau Addysg (Cymorth i Fyfyrwyr) (Cymru) 2017 a Rheoliadau Addysg (Cymorth i Fyfyrwyr) (Cymru) 2018, mewn cysylltiad â diwygiadau a wnaed i'r Rheoliadau hynny gan Reoliadau Addysg (Cyllid Myfyrwyr) (Diwygiadau Amrywiol) (Rhif 3) (Cymru) 2023 yr adroddodd y Pwyllgor Deddfwriaeth, Cyfiawnder a'r Cyfansoddiad arnynt (mae [SL\(6\)431](#) yn cyfeirio at hyn)."

Roedd adroddiad y Pwyllgor ar [SL\(6\)510 - Rheoliadau Addysg \(Cyllid Myfyrwyr\) \(Diwygiadau Amrywiol\) \(Cymru\) 2024](#) yn codi materion tebyg a oedd yn codi o'r gwall hanesyddol.

A allai Llywodraeth Cymru gadarnhau a yw'r materion a oedd yn deillio o Reoliadau 2024 yn cael sylw yn y Rheoliadau hyn? Os oes cywiriadau'n cael eu gwneud, pam na chyfeirir atynt yn y Memorandwm Esboniadol? Os nad oes cywiriadau'n cael eu gwneud yn sgil Rheoliadau 2024, a oes modd rhoi'r rhesymau am hynny?

Ymateb Llywodraeth Cymru

Mae angen ymateb gan Lywodraeth Cymru.

Trafodaeth y Pwyllgor

Trafododd y Pwyllgor yr offeryn yn ei gyfarfod ar 27 Ionawr 2025 ac mae'n cyflwyno adroddiad i'r Senedd yn unol â'r pwynt adrodd uchod.

